

靜

厓

詩

後

稿

靜厓詩後稿卷十一

鎮洋 汪學金 敬箴

古今體七十三首

戊午正月  
盡三月

戊午元旦試筆和石君師韻

妙鬢雲現吉祥文一縷心香淨界薰  
九九周圓開法藏  
千千徧滿入聲聞  
光音兜率宮中布功德  
維摩室裏分  
從此人天大歡喜  
流鈴震杵盪魔軍

遊大觀亭拜余忠宣公墓

雲構霞梯瞰碧潯  
曙華千里接浮陰  
文章烟月江山蹟

忠孝神仙天地心化鶴魂歸春寂寂啼鵑恨鎖夜沈沈  
無情最是東流水閱盡興亡直到今

和石君師同遊大觀亭韻

膏澤滿江城春臺何熙熙從游選遐境仰止來崇祠沿  
緣轉林麓起伏龍山支豁然見江天大觀盡於斯虛空  
受羣動靜照妙不移恬鱗謝貧餌繇羽遷喬枝何幸侍  
几杖導我升堂基和平感神聽此意默相知

和博兒寄詩韻五首

蕭然行脚一頭陀但了浮生莫管他煨芋懶來將老矣

散花著處奈緣何山雲小住供趺坐江水多情送踏歌  
學道最難除結習鐵鍼磚鏡費磨磋

大道何嘗有異聞眼前止水與行雲指禪得悟非關想  
心易能通豈在文夜氣清虛離宿垢晨暄竒暖入衰筋  
梅梢消息從人覺江北江南總不分

新年簪勝作癡翁休把閒緣溷乃公神谷遠探林屋洞  
情瀾險測呂梁洪功求艮背三田轉法乞安心萬境同  
重到仙源不迷路人間咫尺隔塵紅

一宿蓮廬亦愛吾尚餘蹤跡寄菰蘆逢迎野老提壺勸

嘲笑詩人布穀呼

見蘇詩

泛宅烟波稱漫叟著書歲月號

潛夫桐花倒挂留仙種宛轉清聲待試雛

宦退何心歎寡貧逍遙天地一熈臣定巢海燕猶依主  
謝餌濠魚每避人許我採芝尋舊約願渠敲菜念先民  
他年拔宅全家去始信蓬山別有春

存得齋中移置盆梅和石君師韻

護花如護氣藏密歸環中養花如養神虛室春融融花  
光與人意妙趣將毋同邂逅悅予美窈窕見子丰蕭齋  
風雪夜照我酒波穠笑比丹砂顏姹女發嬌紅

再咏存得齋盆梅

羅浮仙子垂雲鬢  
翩跹揚袂升堂堦  
葛三滕六莫敢侮  
粲然一笑舒丹葩  
似憐丈室太寂寞  
天宮俠侍雙娥媢  
有情已墮色香界  
不語漸覺形神交  
午窓坐睡入聞觀  
弄晴春鳥聲咬咬  
芳心含露好醞釀  
底許夢蝶輕相捎  
玩梅十絕

皖署後圃老梅數十本  
余逢花時嘯咏其下  
靡間晨夕盡態極妍  
因用蘇集中和楊公濟梅花  
韻作玩梅十絕

風饕雪虐損天和回斡春陽此處多我待花開不歸去  
問花留我意云何

斷根感節卧圯臺滿徑頑雲撥不開夜半東風明玉雪  
屐痕無數破烟苔

一日花前繞幾回花因為我盡情開霎時攝入琉璃界  
特地冰蟾破夜來

瞥眼繁華金谷樽啁啾翠羽訴初昏獨攜鐵笛江樓去  
喚起孤山處士魂

道是河陽旌節花依然點綴竹籬斜江城休唱春燈曲

易惹顏顏怒阮家

雀舌連朝啐未開  
畫堂絲管漫相催  
最高枝上誰攀折  
好待詩人點筆來

聞道丹砂可換肌  
光風先照向陽枝  
為憐瘦骨如枯腊  
付囑東君手自醫

斜日園林片片飛  
色香空寂悟禪枝  
緣何世相成貧著  
纔見開時怕落時

嶺上飛仙蛻骨輕  
羅浮舊夢說分明  
誰知援手相留意  
又是今生未了情



空谷深山自一家十年貞素勝天邪  
留將鐵石心腸在長向人間賦此花

憶梅十絕

弊居梅事頗佳今春留皖負此花矣因再用前  
韻作憶梅十絕但不二門中生分別見未免為  
花禪所笑耳

冰絃凍澀理雲和似訴幽懷掩抑多為問故園花發處  
天寒日暮態如何

香林雪海照樓臺一片光明佛地開  
萬隊玉娥齊笑舞

鸞蹤鶴跡滿蒼苔

底事春回客未回  
山童遲懶報花開  
枝頭盡日暄禽語  
無復閒門剝啄來

生憐冷蕊墮空樽  
草閣江深霧雨昏  
狼籍香泥全不掃  
開春癡蝶自銷魂

曾記西涇手種花  
傍崖臨水故低斜  
毗耶室有香嚴國  
不數吳中鄧尉家

夢中綵筆又花開  
裁罷雲藍藻思催  
一樣江南望江北  
隴頭已有寄書來

鍊液天然冰玉肌  
蕊珠容易見瓊枝  
掃花仙子司花女  
一著情塵未可醫

三日晴窗暖雪飛  
漸看綠葉吐青枝  
梅檀自結氤氲界  
一磬雲龕度六時

玉華宮闕曉雲輕  
定慧門頭見月明  
頃刻白毫光徧現  
此花非想亦非情

海山聞住洞仙家  
銀蒜冰綃玉辟邪  
萼綠縱然無定所  
也應報我一枝花

啼鳥

春風炙煖萬笙簧一片宮商度苑牆自是迦陵宣妙樂  
人間那許譜霓裳

正月十二日石君師壽讌詩二首

瀛洲儒宿冠鑾坡鎮節廷銓翊賞多中外班資五十載  
後先輩行廿三科常將平格徵天壽惟以明良叶  
帝歌大厦仔肩誰柱石康彊須祝老盤陀

但聞淮潁說年豐不覺春生杖履中九鴈徧歌盈缶雨

六鼇爭舞試燈風登朝鄴相仙緣在居洛溫公物望同

為報今朝新釀熟

坡公有正月十二日天門冬酒熟詩

花枝笑比醉顏紅

元夕與石君師夜話

節府清如水香龕寂似僧  
簷梅浮霽月窓竹灑春冰  
豐樂民心足高寒道味增  
夜談頻翦燭罷踏六街燈

種梅再和前韻

色香本無住偶隨代謝中  
一朝返其根暢遂復怡融  
乃知厚載力不與盆盎同  
雨露積濡澤柯葉增猗丰  
借問明年花應比今春穠  
處士骨未槁仙人顏再紅

晚晴閒步後園梅事將闌  
聞牆外度曲聲因有是作

江城一笛落梅風吹到園林曲未終花影倦臨春水碧  
人情貪看夕陽紅羌無好句堪持贈賴有清樽不放空  
噤噤山禽難忍俊已隨板拍過牆東

種蘭三首

春蘭如佳士含薰在空谷苟非同心人國香不自鬻一  
朝薦華堂拂拭意何篤感此惠好情慰貽君子辱勉為  
席上珍遠別蕭艾族本乏媚悅姿無言矢幽獨

小草豈足貴美愛出所親殷勤託栽培殊契相與申根  
芽脆冰玉疏剔露鮮新井華沃甘冽土脉發鬆勻及時

吐芳秀有美揚清淳厚德莫云報願言佩服紉

局促置盞缶何如澗與岑但恐風雨多薄植非所任當  
門衆乃忌入室久可欽伴我竹素書和以瑤華音撫操  
忽太息掩卷復沈吟問我何所思湘水阻且深美人已  
遲暮千里傷春心

雜詩和石君師韻

朴斲戴地軸游鯢戲天池偉哉神運力始信造物奇大  
釣妙無為斗柄視密移一心御萬境履道忘險夷  
芸生共一氣豈不繫疾痛形骸既乖隔脉理遂闕壅導

我天稷源委輸百川從有孚利在需違行惕終訟

春雪

急雪打窓寮回風曉尚饕深將及牛目落更旋鶯毛菜  
壤融酥乳梅林瑩玉膏春裘留未典坐擁鬪吟豪

雪梅篇

瑤姬不相妬兩美合一妍清寒出明艷妙相成天然罌  
風吼碧落夜凍驪珠淵人間陋脂粉噤瘁絕可憐翩翩  
藐姑射鍊氣凌非烟戲折珊瑚枝錯落照我前恍疑釣  
天游邂逅萬婢娟夢中無綵筆凡語焉能仙蟻臣乞五



斗僵蟄舒連蜷三田蕩滓穢飛躡蓬萊巔

填倉日戲作

胃為出納司穀府曰神倉關膈利清濁榮衛理陰陽委  
輸入絳室宣泄通黃房薰蒸下膏露灌溢流天漿惟虛  
故善受厥用何不臧世人重口腹饕餮不自量沈酣酒  
舖餽美疾生膏粱今日盛宴會春盤列羶薌填倉踵燕  
俗據案呼齊俗重羅造餽飫細磨出餠餽淳熬配薤白  
肥腴薦韭黃飮坐齒先決踏筵臂爭攘腥腐嘬虬蜉糞  
穢轉蛄蟻萬蚋怒齧噬三彭喜跳踉塞兌已撐拄朵頤

且蹶張滿覆亦有戒壅潰安可防吾聞乞食法蔬筍味  
真常又聞辟穀徒芝朮製清芳空靈慧命續澹泊仙根  
長可憐飽侏儒莫笑飢東方

題王子卿觀齋圖

一陰從始來漸長歷遜否聖人有危詞於觀獨殊旨五  
陽處中正巽順天下理全體乃大艮萬物所受止是曰  
觀在上卦德取諸此苟失時與位過此則剝矣譬如一  
身中心君實卓爾淵默照羣動百骸喻其指目者心之  
機凝神在返視修性務存省修命凜顧謨匪直退紛華

庶幾進深美所以觀吾生无咎為君子觀齋利用觀請  
自觀心始

柳色

氤氲非霧亦非烟知是陽和醞釀先色界遙分光碧地  
根門微透始青天逢春露氣溶溶滴入夜星精歷歷懸  
白淨瓶中窺妙相拈機休落有無邊

海棠未開嬌紅奪目詩以詠之

東風放顛冶情漏萬點相思種紅豆嬌羞怯解絳羅襦  
癡憨懶脫黃金釵酡顏夕醉不可扶當階擊碎鮮珊瑚

青禽啄粒上天去枝頭倒掛赭虬珠華清羯鼓催未歇  
丹綃密裏同心結玉環春睡初足時蜀山淚染啼鵲血

詠玉蘭

謝庭蘭玉譽雙標寶樹臨春發  
蕚茗木末芙蓉風易圻  
林間蒼藟雪難消縱教珠墮仍留豔  
儘道環肥不礙嬌  
好煉寒瓊作仙骨胎田遠路有根苗

大洞經云胎田  
遠路世發玉蘭

雨望

老屋深春雨高樓漲曉烟江山不速客  
花鳥有情天遠道輕千里流光忽判年  
秣陵楊柳岸待我繫歸船

花前無月而作

海棠庭院雨如絲，  
悵春陰過望期。  
不是有花難得月，  
多應留照故園枝。

時于將東歸

寒食雨和坡公韻

自從傾天瓢，  
新水社公食。  
泱旬散霧鬢，  
跳珠未遑惜。  
婦子賤春膏，  
祈賽罷等瑟。  
坐使焚山火，  
餘憤一朝雪。  
溟漲恐無端，  
尾閭運神力。  
屋漏夜未央，  
觀此虛室白。

春愁不可掃，  
卯酒豈得已。  
登樓望朝隴，  
城郭烟霧裏。  
遠江勢吞天，  
萬頃辨杭葦。  
江南錦鯉魚，  
貽我書一紙。  
稚子

日候門桑柘蔭墟里東風轉帆脚百舌催人起

雨後海棠方開和坡公定惠院海棠韻

抱甕園中好花木國豔天然生是獨珊珊仙骨散寒瓊  
浮頰丹砂換凡俗妬花風雨太無賴似勒嬌姿出幽谷  
朝來百舌喚天明報我千頭壓廊屋若為侔色謝脂粉  
那用徵歌品絲肉惜花幾度破春眠秉燭為歡愁不足  
可無畫史作妖姸賴有詩情配敦淑花奴羯鼓未住手  
山容鵝夷已空腹柔枝宛轉間垂楊倩影娉婷隔深竹  
相逢予美倍有情不知子都殆無目東坡遷謫遇黃州

杜老窮愁失巴蜀紅顏恩怨幾青塚白首升沈兩黃鵠  
更將彩筆與招魂自寫清謠結心曲逢場也學海棠顛  
世界無身豈受觸

清明日作

寒食東風萬柳條江村一路喚餞簫烏啼紅雨迷三月  
人指青山認六朝歸思久淹雙隻堠春愁閒付往來潮  
石泉槐火清緣在欲覓僧窓寄夢遙

擬遊迎江  
寺未果

桃花仍用海棠韻

格磔枝頭開啄木似為詩人愁塊獨瑤池青鳥送花來

渡江根葉皆成俗瓊膏玉髓煉君容沐浴桃康出神谷  
搏桑初照露未乾錯落珠綃攜海屋誰將暖永返精魂  
不惜罽風蛻肌膚春波晴濯錦鴛鴦有紅白並跗者為鴛鴦桃灼灼  
天天歡意足豈有蘇姬怨竇滔差擬秦嘉憶徐淑聞道  
江南新漲生渡口鄰鄰及馬腹村童亂插雙髻了倒跨  
溪犍弄橫竹草長鶯啼三月天遠客羈心千里目但見  
飛花逐水流百折東來下岷蜀仙緣若許假鸞皇世事  
何須辨烏鵲重到元都夢已醒別君歸去青山曲挈舟  
更訪武陵人眼底紛紛笑蠻觸



石君師見和桃花詩再呈一律

綏山蟠木老崢嶸  
摘藻東皇作景卿  
品貴賜緋兼賜紫  
丹還成姹更成嬰  
舍人曼倩聊相戲  
天女維摩亦有情  
願與如來克供養  
花禪知己悟無生

丁巳仲秋就謁石君師於皖留署者六閱月今將  
告歸賦呈四首以達鄙情

問津不厭溯洄長  
便假秋風一葦杭  
海內師資朱待制  
生平父執魯靈光  
也隨冠履趨東閣  
底為笙歌到後堂  
昔日兒童今白首  
空憐衰朽負門牆

領袖蓬山一品仙行臺風月故依然客知漁父重來路  
人說尚書再鎮年妙道自超憂樂外元功已贊治平先  
教思無隱誰能會只在花香鳥語邊

憶從福地叩元扃問字侯芭幾度經六月息鵬項服氣  
三年刻鵠漫求形後凋何敢希松柏大藥原非覓杞苓  
猶幸丹臺傳口訣道人歸去養黃庭

薦士山公豈有遺河干自詠伐檀詩虎頭食肉曾無相  
雞尾充犧亦可嗤志在沂雩許曾黜學為農圃任樊遲  
功成若訪赤松去到處雲山負笈隨

二月廿七日同屠梅麓王子卿陶集虛范涓屋出  
游王氏性園至大觀亭過地藏庵晚話得詩四首  
即以留別

垂柳待人攀花枝照客顏園林開霽日城郭繞春山觀  
化知魚樂忘機逐鳥還此間容午坐且覓片時閒  
石壁插空嵌樓臺倒影銜烟浮三月漲樹出九江帆行  
脚青芒屨隨身白木鐙相從掇瑤草嵐翠染征衫  
幽尋不覺遠信步到招提勝境壺中現真源洞口迷客  
蹤感萍水佛性喻蓮泥門外誰相送鐘聲直過溪

後會殊難料臨歧共執袂代飛憐雁燕相狎笑蛩驢晚  
節盟心在春華努力餘江南芳草長莫惜數行書

宋愛川將軍彭城十二景為其子學博照題

北橋片石礪山雲汴泗交流送夕曛一自丹青留絕筆  
英雄想見故將軍

翰墨從來世守難傳經且喜付儒官江鄉耆舊今何在

一例雲烟過眼看

冊中多妻人  
題詠故云

三月初四日歸舟阻風未發詰旦石君師以絕句

招之次韻奉呈

皖公山下敲鐘起節度衙前打鼓開一偈受持參轉語  
法門無去亦無來

夜泊皖口作

顛風初息浪花平皖口帆檣燈火明人比沙禽無住相  
春隨江水有歸情關心碧月三分吐對面青山一角生  
塔影鐘聲緣不淺今宵猶為客留行

羅刹磯

一點危磯出碧潯上方鐘梵答潮音大圓鏡裏無風浪  
羅刹原來即佛心

江行

瀟瀟江潮鳴柁尾  
曉帆一開三百里  
雲影山光出鏡中  
水市烟村如畫裏  
羅剎磯邊風浪平  
池州城外櫂歌聲  
回頭不見迎江塔  
翻恨南風五兩輕

大通晚泊

盡日舟行不繫橈  
夕陽低處見層椒  
拍隄江漲蘼紋蹙  
夾岸人家鏡影搖  
夜息萑苻閒戍角  
春深桑柘鬧村簫  
樵風未與朝山便  
過客蓬窓一炷消

屠梅麓欲同行至此朝九華山繼而

不果故反之

采石磯太白樓

當年書劍任城游曾記題詩太白樓  
曠代無心同逆旅勞生有跡總浮休  
眼中絕筆千秋在脚下空江萬里流  
欲對青山忘世事暮雲落日使人愁

虞雍公祠

隣寇投鞭勢書生擊楫勲天心支半壁  
臣力奮孤軍料敵謀何壯和戎議太紛  
至今遺構在絕磴起風雲

三月十九日抵家作

漫天飛絮撲江津  
踈地垂條繫釣輪  
繞膝兒童問無恙

窺顏魚鳥喜相親坐深池上三更月歸及花前一日春

明日立  
夏矣

急向床頭覓家醞紅櫻紫筍好留賓

時與戴雪  
橋偕至



靜厓詩後稿卷十一

靜厓詩後稿卷十二

鎮洋 汪學金 敬箴

古今體一百三首

戊午四月盡  
己未四月

魏元君詩和韻

至道妙無為洞元開玉清顯景凌蕭臺梵炁標墉城宿  
植稟元化高懷邁凡情純德備乾始章美含坤貞秘籙  
授搏桑遐算軼錢鏗紫虛契幽寥朱嶽揚輝晶忽翔閬  
風駕載駐金庭旌太乙名仙公蚩尤却魔兵真文宣內  
景歷劫心同傾力弱決枋榆何以觀天鵬

新夏咏物一韻八首

新桐

誰洗青瑤幹森森覆井泉  
琴材彫未老圭葉翦猶圓  
涼借先秋雨陰留欲霽  
煙殷勤待花鳳消息報靈仙

新竹

午夢醒寒碧當軒弄響泉  
脫苞爭秀削挹節自堅圓  
深徑難容暑虛亭易化煙  
青筇落何所記取籜龍仙

新蕉

隔簾踈竹石近檻暗苔泉  
密卷容杯小平舒試墨圓  
綠

天涼有雨碧落曉非煙百節能通否輸君骨抱仙

新荷

頃刻芬陀現華池滴滴泉通根虛自直結蒂密能圓活  
脫初承露清空不漲煙臨風持一瓣到處小游仙

新秧

西陌復東阡家家曉灌泉一渠穿雨直萬笠覆雲圓浴  
鷺低翻雪浮犍遠隔煙呼兒縛秧馬野老活神仙

新茶

夢裏說茶禪重提舊石泉髻絲驚歷亂舌本見清圓碧

乳膏春焙黃芽熟午煙更須破昏睡風腋逐飛仙

新燕

生小穿花去紅襟浴碧泉試飛毛尚濕學語舌初圓何處尋烏巷相將乘紫煙南風吹汝急漢殿欲留仙

新蠶

茗溪清且澗閉戶煮香泉雪蛹千枚大珠胎一寸圓筍茶同上市桑柘漸無煙園客煩相助功成並作仙

和郭景純游仙

膠擾敝形役滯泊怡神棲鼎鼎百年內愚智同蒿藜荒

阡悲宿莽華堂感新蕢自非乘蹻人疇能躡飛梯元都  
燕淳圉結璘犇羿妻遊戲琴高魚指揮初平羝借問椿  
菌年大小焉可齊

盧敖之北海邂逅語若士掉臂難久留竦身丹霞裏淮  
南誕漫徒古強庸妄子大道法自然奚為尚口耳中黃  
一寸宮橐籥由茲起存神合金方清嘯見虎齒翩翩青  
鳥來阿母為我使

姑射有神人冰雪肌膚鮮我欲從之遊遠在海中山貽  
我養生方和神綏五絃胎田翳隱芝華池涌靈泉潛陽

噓子半溟滓生微烟長眠振雞臂兀坐巢烏肩幻形未  
辭世美意聊延年

大造不私物四生遞榮謝瘖蟬槁元冬腐螢熠朱夏嗟  
我有覺靈念念同遷化偉哉神運力扶搖御尻駕俛視  
身世間如去逆旅舍華表鶴歸來壘塚吁可叱

莊生著逍遙屈子賦遠游天池任翱翔丹邱可方舟九  
州既卑隘舉趾靡所投摩抄視銅狄瞬息五百秋無情  
清渭水滔滔日夜流

莫陳瓠子決休議柏梁災岩堯建章宮縹緲望蓬萊蓬

萊不可見更上通天臺齊奏昇平曲迭進萬年杯俠侍  
尹與邢脩蛾映豐頤皆言上元籙曼壽積京垓天地樂  
未央聖人道將孩飢死東方生不如牧豕才

長生祖清淨抱一載營魄用志既不紛專氣備純白青  
青歲寒姿豈無後凋柏雨雪黯關河摧積忽已夕蜚鴻  
滿四野黃鵠下太液一柱東南天辛苦補媧后何年赤  
松游相從紫霞客

四月朔博兒舉一雄用坡公賀子由生第四孫斗  
老韻示之時余有四孫矣



室中養爐鉛幾見老子沐堂前開湯餅忽報嬌嬰浴家  
祥在吉戊十年始必復老眼盼犀角遠書寄魚腹汝雖  
早登第此願殊未足猶子亦比兒三索空飽目今朝小  
於菟繡襦出奇玉天心愛芝蘭種德務培沃或為凌雲  
姿尺握護萌竹學易悟盈虛理數稔已熟床頭有萬卷  
他日好付讀吾衰謝門戶冠婚豈遑矚汝壯勤畱畬經  
訓庶可卜抱子重先民勉旃事家督

和陸文淵初夏閒居八首

簾櫳小坐午時香斗覺心清世界涼絕少叢書成魯望

更無短札報君房  
過雷牆竹抽梢密  
帶雨簷藤放蔓長  
自笑浮生獨不化  
支離天壤一皮囊

風槐挾雨晝沈冥  
新水迎梅滿注瓶  
乳燕出頭泥脫紫  
子魚翻背浪跳青  
學裁寬褐身將隱  
戲草奇觚老復丁  
半百生涯隨分過  
髭毛何事訝星星

一年春又去堂堂  
結夏先安丈室床  
涸鮒乞泉貪苦樂  
腐螢弄火誤炎涼  
掌中翻覆彈碁局  
腳下升沈蹴鞠場  
守默觀空憑道眼  
幻塵起滅隙駒光

一自抽簪賦遂初  
餘齡決計付團蒲  
心將收妄牛穿鼻

氣欲求專鳥伏雛三窟不謀安我拙六窓俱應怕人呼  
渡頭風浪朝來急只問漁竿在手無

冰蟾近海共潮生露坐輝輝倍有情洞口辟蘿枝自裊  
庭心竹柏影交橫隣歌夜序分秧水村諺晨占打麥晴  
我是東吳老桑苧也隨婦子祝西成

昨游曾記皖公家小別煙江水一涯篋衍舊存涇縣紙  
囊封新遺歙州茶月吞鯨渚風鱗蹙雪吼龍山霧鬣猗  
試拍髯仙鐵潯板浪淘沙曲足豪誇

無端醉夢幾人同悔弗從前學大還次律隔生猶有書

樂天歸去豈無山支床寂默龜偏壽守戶逍遙鶴不頑  
一字丹丸重領取心頭自在始能閒

莫道山家少品嘗流連節物逐時光偶充客饌瓜環脆  
屢乞僧齋豆乳香茶有三經師陸羽藥無二價識韓康  
玉堂枉煞蓬池鱸畢竟田園味較長

### 蜉蝣行

君不見棲日之鳥入悲泉戲月之蟄出丹淵不如蜉蝣  
無思無慮全其天又不見戴山之鼇舞崑瀛徙海之鵬  
擊滄溟不如蜉蝣不飲不食忘其形乾坤蜉蝣一俯仰

宇宙蜉蝣一來往茫茫大化有時盡七尺空為保蟲長  
儀秦之辯蜩弄舌猶有蜉蝣處掘閱貢獲之勇螳奮臂  
獨有蜉蝣隨蜚蜚蜚田竇之門蟻逐羶獨有蜉蝣無變遷  
王石之家蜚轉糞獨有蜉蝣寡營殉人謂蜉蝣忽旦暮  
我與蜉蝣迭新故人謂蜉蝣倏晴陰我與蜉蝣同古今  
世間幻質孰久長達人一笑齊彭殤嗚呼蜉蝣非生亦  
非死貞元闔闢常如此

山右劉澄齋同年訪余婁上話舊有作

法源霜菊候崇效海棠期別後殊難料天涯各有思何

當千里駕與子一尊持重話春明夢槐柯影漸移

酬和澄齋四首

姑胥直下木蘭艘不是吳儂款乃腔千里足音臨晉水  
七我心緒話婁江鬚眉河朔英姿在肝膽乾坤大力扛  
共信神交無契闊底憑問訊鯉魚雙

霓裳同日踏瀛寰杜曲花枝記往還承露金莖霄漢表

占星玉節斗牛間君休館閣論優劣

澄齋由翰林  
改官內閣

我自

江湖樂散閒清簟疎簾箕踞坐可能無夢到蓬山

豈有詩名萬口傳苦勞腸腎費饒鐫鍾期邂逅難忘操

靜庄詩後稿

卷十二

七

賈島推敲也。凝禪聊與解衣銷劇暑，已將覆瓿付他年。

曹劉格調聯鑣久

曹謂儼笙宮詹也

跣足追風恐不然

終鮮居平感鵲鴿，嚶鳴求友最堪聽。浮生已屬華胥國，往事空勞逆旅亭。苑烟簫催客老，山陽風笛喚人醒。

澄齋訪曾賓谷，醴使於廣陵，原唱有感於戴琢軒給諫潘巽山觀察之下世故，並反之。

何當海角

同攜手，落落天街望曙星。

滄來州守招同澄齋小集，流水居即席口占。

南華隨手活波臣，東里無心使校人。流水六虛何所住，行雲一宿若為因。地疑湖雪堪聽雨，客到滄浪且浣塵。

自是使君通物我竟忘誰主與誰賓

滄來再邀後圃觀荷與澄齋話別

驟雨打新荷陂塘淥漲波曉風清畫諾水調韻絃歌留  
客淘槐葉催童遞茗柯涉江人去也遠道思如何

和杜瘦馬行

征南官馬半死傷可憐萬匹來邊牆九折之坂墮冰雪  
壯士徒步難龍驤西村瘦馬弛羈勒飲水斲草瓜廬旁  
日隨老犢負畊軌四蹄不踏交河霜穀城一編書未出  
斗牛蕭索沈干將愁雲低昂日易暮太息空歌君馬黃



黃榆秋高飽首宿廟堂慎勿疎屯防眼中房精尚歷歷  
晦冥霧雨垂神光坐令駑駘駕閭闔四郊戎馬生金瘡  
低頭伏櫪終已矣安能與汝爭短長

十二銅人歌

祖龍鞭血四海毒咸陽殿起銅人哭大蛇中分一夫燎  
阿房宮毀銅人笑嬴顛劉蹶皆何在猶記摩挐五百載  
秣留老眼閱興亡那管神州幾成敗千里草何青青灰  
飛烟滅愁零丁洛陽道上兩羈客荆棘淒涼少顏色長  
安歸去劇酸辛從知氣數不由人因緣若問鳩摩什為

說先秦與後秦

滄來州守以藤枕檟拂子分贈金門學士及僕  
因次金門韻柬謝

倦時鞫睡醒趺坐侍我毗耶大室來何意使君發清嘯  
親為遠客掃炎埃黃琉璃夢藤州到白簷葡萄花雨開  
隨處延津合雙劍煩渠長作水雲媒

六月望國兒得一女再用前韻

姮娥三五期冰匳照膏沐抱此徑寸珠投我金盆浴胚  
胎祖一炁竒耦錯姤復老夫韞然笑又果湯餅腹含飴

弄七稚翁媪大歡足戊德坤馬貞天骨詫凡目詩人未  
知道強別瓦與玉況聞瑤仙家綏桃實芳沃得非女牀  
鸞襍裊傍慈竹森森吐新芽眼見藍田熟他年摩頂來  
授汝黃庭讀峇嶺海中山何以慰遐矚未了眷屬緣或  
假兒女卜且勿論婚嫁辦道共程督

壬子歲是日為瑤  
華子仙化之期故

篇中所  
述如此

飽蓬蓬

飽蓬蓬祿萬鍾嚴道邛遷乃公三日不食死車中重華  
南面弟弗疵周公東征兄則夷聖人處骨因恩義何所

私一升粟一尺布誰實為此謀再使淮南誤武安平津  
競黨附惜哉不從賈太傅

凝碧宮

柳郎矯矯人中龍清揚白晳肝膽雄洞庭傳書託信義  
手提龍女還龍宮龍宮榜題曰凝碧列礎青玕柱白壁  
鮫綃屏幃十二重犀押簾櫳一千尺此時璀璨羅川珍  
此時甘旨娛嘉賓閭苑花開光不夜綏山果熟壽長春  
須臾樂舞競相屬鞀鐸笙鏞間箏筑鏜鞳錢唐破陣歌  
淒涼貴主還宮曲貴主當年涇水頭怨耦猜防不自由

牧羝有恨家何在填鵲無期路更修倉黃行客俄相及  
邂逅通辭轉於邑橋井褰裳萬丈探錦字開緘滿宮泣  
破空一擲馳風霆朱鱗火鬣排滄溟怒搏頑童作菹醢  
殿前血灑歸雲腥再拜傾心結深意為感姬姜出顛顛  
覆水今看已返流人間應少不平事男兒豪氣薄天雲  
眼中豈有錢唐君湘弦枉致佳人語漢珮難酬烈士恩  
竒緣作合天心巧盧家有女顏色好雙棲紫燕在雕梁  
一夢青禽說瑤島紅塵碧海兩茫茫歸去君山是故鄉  
何處龍吟吹鐵笛竹枝猶唱水仙王

史烈女詩

秀水女史家村字仁和沈守坤吁嗟今我生不辰之死  
歸無門歸無門兮殞其身從容就義三綱存高天厚地  
完我真

同心蘭曲

齊中秋蘭一朵七瓣心合如脣同心之言其臭  
如蘭乃與講塾諸子賦之

紫宮玉女丫髻青銖衣結束來娉婷授我內景虛皇經  
七蕤秘籙妙煉形嬰姁和合嬌黃寧陽氣畢達開關扃

丹華密吐火齊熒芽珠綴露搖瓏玲翹然特秀駢釵亭  
一神兩化出寸莛綠毛么鳳倒掛翎雙鵷闕采照錦屏  
秋風嫋嫋生洞庭湘波湘草烟滿汀英皇出游揚桂舲  
幽香一發巫雲醒絕倒人間尹與邢長生福地無凋零  
盤根下伏龜蛇苓其數上應北斗星屈指人日舒階蓂  
翠版表瑞符堯齡穎禾歧麥登郊垌連理交讓各效  
靈同人于野比德馨含章葆素常惺惺泰茹有象升  
王廷金蘭請勒同心銘

七月廿一日抵暮至吳門滄來邀游虎邱三賢祠

話別用韓詩山石韻却寄

山塘雨黑燈火微棹謳催發沙棠飛到門清風掃殘暑  
石苔濃綠生秋肥行厨咄嗟見真率近時車笠交情稀  
三賢高風照千古心嚮往之如渴饑高朋勝地興不淺  
既醉秉燭排岩扉庭空籟靜轉幽絕桂子灑露烟霏霏  
美游如此亦已足底用紅粉當筵圍楚江萍老渺天末  
惜別未免同沾衣余與金門同有白下之行金門即從此而歸矣病夫倦游聊  
復爾衰筋羸骨愁羈馱煩君多情送官酤籬菊放後吾  
將歸



游惠山和坡公用唐人韻三首

生平愛惠山秀澹舍深蒼昨秋適我願始踐山中堂雖  
無老髯筆題石蛟螭翔陵跨九龍脊浩蕩翻湖光坐酌  
第二泉齒頰流甘香魂夢逐清景此意何時忘

再至成舊識趁曉避游人初陽藻林麓萬象何鮮新名  
園引幽澗水石相磨磷風涼一洗耳脫然謝根塵臨池  
俯澄碧薄翳空秋旻買山約果遂誅茅來結鄰

茲山以泉勝笠亭蔭喬樾日汲走萬缶涓脉幾曾絕大  
哉浥注功肯等漚沤滅一掬潤詩吻奚假試團月觸熱

愁我懷過午榜停發更語出山泉為霖濟鮒轍

謁高忠憲公祠

傾厦原非隻手扶天將直道付純儒五噫去國梁高士  
九死沈湘楚大夫氣作長虹歸海疾心懸片月印潭孤  
心如孤月本無生死戢山定論真知己先後成仁志竟  
公臨終別友語也符

與同人約游金山用蘇韻作詩堅之

年來漸與波濤耽昨游江北今江南笑指浮圖語行客  
生平蹤跡曾經三頗怪兒曹不解事蓬窓日午眠如蠶

青房詩集卷之二  
江天勝概失覲面毋乃凡骨遭譏慙昔聞坡仙屢來往  
投詩萬丈蛟龍潭妙高臺畔弄明月睥睨世界爭豪酣  
脫然四大一撫掌解帶留謝機鋒談高賢尊宿兩寂寞  
空餘鐘磬敲雲龕扁舟泛宅亦瀟灑於此退讓情何甘  
少思寡欲近聞道獨於山水難辭貪片言堅約到絕頂  
試較腰脚吾差堪坐待晚潮峭帆去凌晨又訪棲霞庵

### 游金山寺

手揮白羽扇搖蕩塔鈴風報汝山中信來迎海上翁題  
詩梵王壁酌酒馮夷宮更與江神約歸帆待我東

裴公洞避熱小坐

小有洞些子上乘禪  
剎那衆生皆熱惱  
我輩且婆娑  
一炷香參祖  
三車法秘魔  
此間本無住  
却問住云何

棲霞和壁間韻

一葦長風一粟身  
尋僧谷口問樵薪  
橫江鶴過昨宵夢  
到寺犬迎前度人  
婪暑忽從幽處淨  
老禪漸得定中真  
磬頭忙也行  
勝倦半榻茶烟謝六塵

般若臺追憶卧禪子和金門韻

卧禪子戴石士也

曹溪倒淨瓶  
袈裟收不起  
開眼萬頃濤  
合眼一滴水  
卧

禪住山時面壁心已死欲問般若因天風落松子

燕子磯口號

燕子飛來何處家江流依舊抱平沙行人欲問青溪路  
立盡斜陽數暮鴉

題歐陽棣之又一村圖

白下亭前夕照村當年王謝幾家存知君怕踏烏衣巷  
手種秋花早閉門

和石君師獨游邢園之作

山公到竹林澗壑自清音天送催詩雨人依菱舍陰過

江星使節

是日在園候主試渡江

運海水仙琴獨樂豈公志遲回

待素心

戴可亭學使招游邢園再用前韻

臺閣忽山林聯翩聽谷音欲逃秋後暑先借午時陰雲  
岫承軒蓋風泉度筑琴緣園緣作合

邢園名緣園

去住總無

心

和同人隱仙庵讌集之作

青山偃蹇獨當門小隱仙人道亦尊枕底一炊增夢怕  
花前雙榼寄思存禁鷄偶聚應懷闕野鶴遲飛自避軒

靜居詩後稿

卷十二

五

是日子却笑菟裘營未已  
白頭紅粉散隨園  
未赴招

八月十四夜秦易堂同年招集景陽閣

我愛秦淮海相逢古秣陵  
鬚眉留莽蒼肝膽露飛騰  
繞郭山如畫開軒月有棱  
夜深笙鶴響人在最高層

中秋坐月憶舊

不分秦淮河畔月依然  
三十四年前今宵玉宇高  
寒調當日瓊枝綺麗篇  
斗轉參橫飛露脚酒闌燈  
炮對霜顛老貌擣就長生藥  
乞與刀圭逐散仙

十六日劉金門程也園歐陽棣之王子卿陶集虛

楊叔溫王葆初并兒子彥博彥國同游莫愁湖  
樓邊積水拍隄平樓外飛霞接檻橫但看好山還繞郭  
休論名士與傾城客游湖上能無醉秋到江南亦有情  
滿堞樓烏催底急倚撓難待月華生

和慶雨林將軍韻四首

勝地趨庭紀昔游

昔侍文端公於江南

國恩先緒待公酬大江

東去留鴻爪上將南來看虎頭劍氣夜衝牛斗暗陣圖  
曉對海山秋軍鏡一曲雲濤湧笑睨鴻蒙入芥舟

興桓同扈

屬車游萬馬羣中互唱酬雪帳豪吟花撲



面月軒清詠影當頭

甲午木蘭  
庵從事

檐帷海岱迎除臘槃敦

長安憶隔秋

丁未青州  
入觀事

天末懷人應及我可知張翰已

扁舟

也慕長風汗漫將中年衰病願難酬行藏已付山埋骨

卧起何嫌屋打頭伯雨深流南紀澤將星遙動朔方秋

雨林自吉林  
調任江寧

過江一笠來相訪萬斛龍驤有釣舟

樓臺暇日奉歡游萬里江天景畢酬幕府能青佳士眼

詞場易白少年頭令嚴詩律傳清畫政肅觥籌對素秋

欲問從容濟川略襟懷浩蕩一虛舟

隱仙庵看桂與雨林將軍話舊

自笑青筇不告疲嵐光騎影照參差山中宰相游仙處  
庵以陶隱居得名樹下將軍揖客時晚節共期心鄭重古香獨  
抱骨蒼竒乞湖道士無人識蹤跡猶勞舊雨知

和金門學士重為侯葦鄉先生書扇詩

金門學士受業於侯葦鄉先生之門先生出宰  
三水時嘗賦詩二首書扇贈行會李恭毅公撫  
粵見而竒其才留貯篋衍遂相攸焉戊午秋訪  
先生於金陵索書舊詩學士既錄以獻復系一

律紀事述情蓋兼有之示其戚友學金因和是篇

劉樊姻眷本天成一扇詩媒百巧生自是聚頭符吉語  
果然坦腹遂嘉盟玉堂染翰香重拂珠浦論文意早傾  
廿載舅甥師弟感旁人休認畫眉情

和金門留別韻即送其歸萍鄉

欲折青溪柳數行江南相送莫相忘幾回桂樹招淮嶺  
一路萍花到楚鄉聯榻喜添情話密逢場羞作冶游狂  
板橋臘有村帘影十里西風別酒香

笑遣兒童強應科此中得失覺無多  
鐺聲不信驚尊宿  
髻樣休勞問阿婆  
有客偕來偏別去  
無心小住奈緣何  
現前舉似觀空法  
皺性須知不是河

石君師監臨出闈移植雙桂於江寧行臺命賦一律

管領淮南萃衆芳  
雙標聲價重東堂  
節臨寒露秋成實  
月讓文星夜放光  
是日寒露節八月勝也  
此地栽培叨手植  
他年

愛敬奉心香  
老錢留得洪都種  
江右試院有錢香樹尚書手植桂余丙午典試

時開花極盛  
曾見名材出豫章

題許秋巖太守勸畊圖小照

五茸城畔甘棠樹移向秦淮渡口栽聽說淞南諸父老  
望公驄馬踏春來

倩誰水墨寫雲藍豚柵雞栖景最諳不著六朝舊金粉  
要留真朴在江南

秦易堂同年招游隱仙庵和石荅師韻

南部烟花委劫塵年年秋草為誰新臨春結綺都無主  
夢醒隨園白髮人

山中宰相有遺庵笑齒金方伏怒魃底向丹臺睇十賚

松風樓下睡情酣

淨明忠孝神仙業便是旌陽度世書却笑道家傳服食  
勸人常餌甯封魚

隱仙庵道士精於治危故戲之

喜雨和石君師韻

秋陽凌白藏金爍來源枯元膺受熏灼痼疾何時蘇亢  
鬱滯榮衛拘攣慘肌膚寸田起荆棘荒蕘紛難耰一身  
推萬物需澤焉可無徹宵聽簷溜溝水朝翻車遙聞吳  
楚郊喜色騰丁夫更祝鍾阜雲被我海東隅徐徐驗夜  
氣霖霖相涵噓

謝滄來惠菊

報我重陽信歸來菊可尋還分三徑賞同證九秋心節  
以開遲見交因耐久深忘言得真意此理悟陶琴

病中和滄來見懷韻二首

浮生付予總由天凡骨原難妄學仙已覺有身皆是患  
不知於世更何緣靜便竿筑親茶竈老眩丹鉛廢研田  
槁木死灰休笑我空山依舊小乘禪

蘊暑經時尚鬱陶感秋逢節倍刁騷龕燈寒弄疎花影  
簷曝溫添敝袴毛半晦蔬畦留雪甲十年酒醎負霜螯

文殊來問維摩疾以默相酬義自高

和滄來訪梅村先生祠韻

梅花庵主舊林邱萬事渾如水瀉溝  
參佐廨空應有恨儀同宅廢不勝愁  
祇緣風雅思前輩漫惜簪裾集勝流  
燈火淒涼遺稿在當年忍對秣陵秋

送滄來州尊擢守彭城即次留別韻

礪雲如蓋馬頭生露冕迢迢楚水程  
已見雙旌揚祖道昨冬調督礪工徐人德之瀕行  
導以絲旗上書公正廉明四字重來千騎擁專城  
梅花小雪郵亭信棠樹清風羨舍情  
何日黃樓訪詩守一樽



同聽落洪聲

前作言不盡意復疊和四首略叙七年以來彼此  
蹤跡以志久要不忘之義云爾

此緣畢竟訂三生同詠霓裳首發程春日琴尊懽杜曲  
秋風車笠話江城澹交自別鹹酸味直道深諧藥石情  
七載從公賡伐木友聲親切總心聲

也從世外說無生容我疎頑不中程燕坐偶臨居士室  
辯才先躡化人城菜根味好書無價題贈菜根軒額菊把香寒  
酒有情更愛碧梧修竹畔君家雛鳳弄清聲

憶昨秋江別緒生無端一櫂各分程聯翩五馬臨常郡  
鄭重雙魚到皖城我輩行藏隨定分天涯去住動關情  
黃河遠上誰能唱合付銅琶鐵板聲

海月江潮次第生西風屈指十三程水逢砥柱爭歸壑  
官與金隄並捍城寂寞魚龍先懾氣叱離雁鶩最紆情  
此行莫灑臨歧淚快聽襄勤濟美聲

于襄勤公治  
河功績最著

和香山達理二首

委形隨物化藏神希天通逍遙九州駕偃息一畝宮簞  
瓢豈云嗇鐘鼎未見豐既慕啟期樂遂安於陵窮壯往

憂惴始衰退知福終如何殷浩輩咄咄愁書空冰蠶與  
火鼠秉性諒不同被褐而懷玉浮游守規中

騶孟沮嬖臧宣尼厄陽虎吾道誠非邪始陰戒用女聖  
賢愚不肖天壤錯傳伍當其大化盡共此一抔上盛衰  
榮辱間造物若有主名譽已匪真壽富更奚數中有不  
亡存達者貴自取來復見天心幽獨默無語

同學和作有於禪元兩門生分別見者舉盤陀尺  
木二老之說以廣之

合掌無生忝彈指宿命通乞食舍衛城應供堯率宮八

萬四千門豎義何茂豐海水一毛孔辯才安可窮相對  
了無言要以寂嘿終此理本真實昧者墮頑空顏喟與  
曾唯解人將毋同吾愛知歸子所樂在其中

火中制毒龍水底伏渴虎丹母哺神嬰黃婆媒姹女蛻  
骨生羽毛不與塵世伍當其下手時專意在煉土出生  
入死鄉萬化之所主紛紜彼家言未暇更僕數此實養  
氣功匪可襲而取吾學盤陀翁守一事斯語

臘望對雪用坡公韻寄懷滄來守

使君白雪唱驛遞久未和息蜡歲云徂坏蟄凍無那一

庭銀竹垂千里玉花墮沛陽雲飛揚汴泗浪衝簸澤鴻  
依嗷嗷皋鶴舞瑳瑳蜜香壓糟牀瓊糜飛麥磨惠豈憂  
天慳力勿棄地貨梅心清自知松節挺莫挫霜虹亘跨  
隄冰蟾皎懸座借恂穎川留資汲淮陽卧發硎解盤錯  
盈缶填坎壈壺簞露冕親舂鍤泥韞浣疲氓漸歡騰老  
守亦愁破緘書念朋交誦詩述吏課賴公廊廟才拯此  
溝壑餓郵筒報新年聊作公堂賀

夜氣吟和石君師韻

鼎鼎百年幾平旦梏亡誰免牛山嘆先天氣至疾穿梭

盪決猛士揮前戈首搖尾應忽而率右按庚辛左甲乙  
驪蟠九淵不見底黃河倒挽天稷水斗杓端正無欹斜  
義車弭節停鞭撾金烏閃閃翻流沙千息濛濛兀不動  
醺騰骨醉浮蛆甕徧滿三十六宮春夜半東風解嘶凍  
五更霜鐘漸催曙睨而視之睡蛇怒識田荆棘未可耘  
苦海風濤頗難遡盤陀老子夜氣吟讀之能開茅塞心  
惜哉今人不師古須臾棄簡如伯魯

復七歌用蘇詩陳守道韻

太虛有物曰長生與人纏綿殊有情浩然獨先天地立

寂然不與陰陽爭慶雲未升驪睡窟罡飈不動魁潛院  
緯蕭遺珠得亦易可惜求者非堅誠復初學人根鈍劣  
下士聞道徒為名老錢度世不肯棄接手扶掖游虛清  
致一專柔退藏密三字剖決參同精東瀛萬古搏桑枝  
燭龍欲吐光陸離海底珊瑚誰所取除是妙手空空兒  
崑崙頂上但迴顧頃刻透徹青琉璃金烏擘翅忽入地  
隱隱蟾兔生於西是時葭灰起緹室冰輪三五揚明輝  
天心來復長不改此中好覓還元期漫道覺者七日得  
應嗤昧者十年迷

喜雨

秋旱冬猶涸同雲至後期地中雷欲動天上雨先施歲暮嗟何及陽亨喜可知草根心一寸生意已潛滋

招雪篇和石君師韻

天寒海霧愁霏霏昏鴉叫噪城上飛瀛洲玉塵難到地  
空山長苦鸞鳳饑安得幹運回陰機琅玕窟落歎九閨  
應龍乘雲輔羽翼元氣淋漓布皇澤富媪不惜英瓊瑤  
日暖藍田霽騰濕江南三白父老喜臘甕沿村香麴米  
醉攜鐵笛莫釐峯吹落梅花八百里



十二月十九日次蘇集韻

長公真天人浩氣凌虛廓靈辰乘蹻游疑跨黃州鶴梅  
花吹玉雪欬唾散碧落俯視東瀛流一掬小於龠公昔  
登廊廟志本在邱壑曷為羣小輩猜忌力根却謫宦投  
僂黎朝跡剗館閣幾成白馬廐衆嫉青蠅惡豈知處憂  
患心空了無愕幸茲千載下親炙宛疇昨譬如飲醇酎  
所受隨量各生平尚論心微公竟誰託深堂薦蘋藻再  
拜酌康爵醉筆灑九垓風霧集芻霍

已未元旦試筆寄石君師

佛心仙福妙生春煉取黃芽入鼎新獻歲日同逢己未

立春  
己未

朝元人合守庚申

歲朝  
庚申

山中自傲寒梅骨世上應

忘小草身最憶盤陀老居士蒼髯丹頰倍精神

### 詠白桃花

東風澹而冶盡日吹春園瑤草遠無際縞衣深見存悟  
禪非色色遣恨不言言怡悵暮雲合仙源杳洞門

### 曉之崑山抵暮而回戲成一律

天際烏雲水墨堆短帆轉側傍林隈青山白塔半程見  
細雨斜風一面來到手漁竿防棄擲攢眉郡檄怕傳催

書月言後禾  
時有召起  
史館之信

出門那似今朝好  
上下江湖去便回

### 再之崑山

至和塘水碧粼粼  
兩槩過從不厭頻  
咫尺故人寧不往  
平寬甫學使試事畢因往訪之  
尋常田父亦相親  
烟蕪出沒烏犍背  
風

絮高低紫燕身  
天與溪山應有分  
去留畢竟不由人

### 虎邱圖為嵇籛浦同年題

夕陽影裏數樓臺  
倚櫂聽鐘暝色催  
瞥見小軒臨水面  
款門曾為寓公來

滄來使君自彭城來  
吳將以考滿入  
覬僕買舟

來會用坡公罷徐州任往南京五首韻贈行

公向彭城去執手歌驪咽江月白茫茫此際難為別別  
來一寸心春風未開結相思梅花下清樽為誰設吳淞  
水曲折并翦不可截黃河雙鯉魚旦暮乘潮發積書篋  
笥中何以緩愁絕

公從彭城來蒲紫榴花紅滔滔婁江水曷不歸我公父  
老雜喜戚喧闐竹馬童遙知徐方民思公正無窮未知  
公何術水至不為凶幾見百日守坐活千人功

問公胡不歸夙駕朝都京廿年抱民瘼鄭重在斯行

九重闢閭闔纖悉紆

皇情方今亟撫字上考書陽城願公披琅玕磊落照彤

薨南風助解阜仰答薰絃聲

下士晚聞道生處苦不熟那堪墮醉夢老眼眩紅綠豈  
乏濟川才陋此杯水覆自揣山澤臞骨相非食肉勞公  
屢勸駕秣馬復膏轂行止匪由人舍旃其勿卜

怡悵玉山筵宛轉金閭路江南亦有情風雨嫺新稭依  
依桑柘間雞雛羣待乳遲遲未忍發惻惻念編戶歸裝  
笑輕齎依然東野具親串躡門來焉用刈葵穠持此冰

藥心可告尚書墓

男彦博彦國校字

靜厓詩後稿

卷十二

五

靜厓詩後稿卷十二